曾子曰、君子以文會友、以友輔仁

古水

乙未年十月十七 / 2015-11-28

破題

不仁者不可友之, 而賢友當以文會也。

承題

蓋友不仁者如臨鮑肆, 久必自臭, 而交遊君子, 以文礪志, 益能輔成令德矣。

起講

且夫仁人之交, 非惟意氣投合, 亦在端愨行止, 養仁弘道。結良友, 知己惡之所在而行愈端; 擇賢士, 知彼善之所存而道可弘。

入題

是故遠邪佞而近賢良, 友仁明道, 其在切磋。

起二股

文者,道之載器,發悱啟憤,至文所以傳誦千古。互申胸臆則道 理愈明,同志琢磨則道心可悟,文章唱和之功也。 友者,德之比儷,陶情化性,益友所以勝踰萬金。共善施爲則德行愈備,戮力斧藻則德業可修,友朋校量之效也。

出題

會友輔仁, 君子所宜為哉!

中二股

君子之志在義,以弘道為己任,聞之則喜。故交遊君子,文章可以說之,以其載道者也。所求之道或有不同,論之難之,于仁德也無損。

小人之志在利,以得勢而自矜,樂在攀夤。故處養小人,非財貨 則不行,以其裕身者也。所謀之勢絕無二異,爭之奪之,于仁德 也有傷。

後二股

得君子為友,似明燈暗室,光燭前路,雖則淡薄若水,以近道而敬親,情計日篤,遂能共建懋業。

與小人相交,似負橐遐征,汗脫中涂,雖則甘美若醴,以背利而斷絕,義隨時亡,難得克襄大事。

東二股

乃知君子會友,是以文章為鏡鑑,明他人之所長;

君子成仁,是以友朋爲輔依,補己身之不足。

收結

然則人世間文章何其多也,八紘內生靈何其衆也,欲得至文益友似又難矣,怪乎哉!